

**Siunnersuummut uunga:
Atornerluineq pillugu Inatsisartut inatsisaat nr. yy, uu. qqqq 2017-imeersoq.**

Naalackersuisut allannguutissatut siunnersuutaannut

ALLANNGUUTISSATUT SIUNNERSUUT

Aappassaaneerinninnermut
Ilaqutariinnermut Peqqissutsimullu Ataatsimiititaliamit
saqqummiunneqartoq.

Allannguutissatut siunnersuutip nr. 2-anut (§ 7)

1. § 7, *imm. 4*, ima oqaasertaqassaaq:

”*Imm. 4.* Naalackersuisut taakku saniatigut ilaasortamik ataatsimik toqqaassapput, atornerluisunik katsorsaaneermik misilittagalimmik namminerluunniit siusinnerusukkut atornerluisuusimasumik.”

Allannguutissatut siunnersuutip nr. 4-aanut (§ 12)

2. § 12, *imm. 2*, ima oqaasertaqassaaq:

”*Imm. 2.* Qitiusumik aqutsisoq tulluurtumik ingerlaqqiffiusumik ilinniarsimasuussaaq atornerluisunillu katsorsaasartutut ilinniagaqarsimassalluni.”

Allannguutissatut siunnersuutip nr. 7-ianut (§ 24)

3. § 24, *imm. 1*, ima oqaasertaqassaaq:

””§ 24. Najukkani atornerluinermik qitiusoqarfinni sulisut atornerluisunik katsorsaasartutut ilinniarsimasuussapput imaluunniit sammisamat tulluurtumik akunnattumik sivilissusilimmik ingerlaqqiffiusumik ilinniagaqarsimasuussallutik.”

Allannguutissatut siunnersuutip nr. 8-aanut (§ 29)

4. § 29 ima oqaasertaqassaaq:

”§ 29. Innuttaasut eqqartuunneqarsimallutik Kalaallit Nunaanni pinerluuteqarsimasunik isumaginnittoqarfiup isertitsiviisa ilaanni inissinneqarsimasut atornerluinermillu katsorsarneqarnissamik peqqinnissaqarfiup nalinginnaasumik neqeroorutaanik atuinissaminnik

periarfissaqanngitsut eqqarsaatigalugit atugassarititaasut Naalakkersuisut Kalaallit Nunaannilu Pinerluuteqarsimasunik Isumaginnittoqarfiup akornanni isumaqatigiissutigineqassapput.”

Nalinginnaasumik nassuiaatit

Allannguutissatut siunnersuummut allannguutissatut siunnersuutip siunertarivaa allannguutissatut siunnersuutip Ilaqutariinnermut Peqqissutsimullu Ataatsimiititaliap aappassaaneerinninnermut isumaliutissiissummini kissaataanut naapertuuttunngortinneqarnissaa.

Ataatsimiititaliap isumaliutissiissutaa allannguutissatullu siunnersuummut allannguutissatut siunnersuummut nassuiaatit innersuussutigineqarput.

Allannguutissatut siunnersuummut allannguutissatut siunnersuummi aalajangersakkanut ataasiakkaanut nassuiaatit

Nr. 1-imut

Allannguutissatut siunnersuummut allannguutissatut siunnersuutip kingunerissavaa Naalakkersuisut (§ 7, imm. 1 malillugu naalakkersuisoqarfiit pingasut inassuteqareernerisigut ilaasortat pingasut Naalakkersuisunit toqqarneqartussat saniatigut) ilaasortamik ataatsimik toqqaassasut, atornerluisunik katsorsaanermik misilittagalimmik namminerluunniit siusinnerusukkut atornerluisuusimasumik.

Allannguutissatut siunnersuummut allannguutissatut siunnersuut taamaalilluni Naalakkersuisut allannguutissatut siunnersuutaannit allaaneruvoq, tassami siunnersuutigineqarmat siulersuisunut ilaasortaq pineqartuq Allorfimmit Allorfimmi sulisut akornannit toqqarneqassasoq atornerluinermillu katsorsaanermik misilittagaqassaaq.

Allannguutissatut siunnersuummut allannguutissatut siunnersuutip taamaalilluni ilaatigut kingunerissavaa siulersuisunut ilaasortap pineqartup atornerluinermik katsorsaanermik misilittagaqarnermut taarsiullugu siusinnerusukkut atornerluinermik misilittagaqarsimanissaata ammaanqarnera.

Nr. 2-mut

Allannguutissatut siunnersuummut allannguutissatut siunnersuut Naalakkersuisut allannguutissatut siunnersuutaannit immikkoortutigut marlutsigut assigiinngissuteqarpoq:

Siullertut allannguutissatut siunnersuummut allannguutissatut siunnersuummi piumasarineqarpoq qitiusumik aqutsisup attuumassutilimmik ingerlaqqiffiusumik ilinniagaqarsimanissaa. Taamaattorli (Naalakkersuisut allannguutissatut siunnersuutaattulli) ingerlaqqiffiusumik ilinniakkap masteritut qaffasissuseqarnissaa piumasaqaatigineqanngilaq.

Aappaatut allannguutissatut siunnersuummut allannguutissatut siunnersuummi piumasarineqarpoq qitiusumik aqutsisup atonerluisunik katsorsaasartutut ilinniagaqarsimanissaa. Taamaattorli (Naalakkersuisut allannguutissatut siunnersuutaattulli) atonerluisunik katsorsaasartutut ilinniartitaanerup Allorfimmit neqeroortigineqarsimanissaa piumasaqaatigineqanngilaq.

Nr. 3-mut

Allannguutissatut siunnersuummut allannguutissatut siunnersuummi piumasarineqarpoq najukkani atonerluinermik qitiusoqarfinni sulisut atonerluisunik katsorsaasartutut ilinniarsimasuussasut imaluunniit sammisamat tulluurtumik akunnattumik sivisussusilimmik ingerlaqqiffiusumik ilinniagaqarsimasuussasut.

Allannguutissatut siunnersuummut allannguutissatut siunnersuut taamaalilluni Naalakkersuisut allannguutissatut siunnersuutaannit allaaneruvoq, tassanimi piumasarineqarmat najukkani atonerluinermik qitiusoqarfinni sulisut minnerpaamik bacheloritut qaffasissusilimmik attuumassutilimmik ilinniarsimasuussasut.

Allannguutissatut siunnersuummut allannguutissatut siunnersuutip kingunerissavaa ass. inuunerissaasut, isumaginninnermi siunnersortit meeqqallu atuarfianni atuartitsisut najukkani atonerluinermik qitiusoqarfinni atorfinitsinneqarsinnaalernissaat.

Nr. 4-mut

Allannguutissatut siunnersuummut allannguutissatut siunnersuutip kingunerissavaa innuttaasut eqqartuunneqarsimallutik pinerluuteqarsimasunik isumaginnittoqarfiup isertitsiviisa ilaanni inissinneqarsimasunik peqqinnissaqarfiup atonerluinermik katsorsaananeranut atugassarititaasussat, akiliuteqarnissamat atugassaritaasussat ilanngullugit, pillugit Naalakkersuisut Pinerluuteqarsimasunik Isumaginnittoqarfiullu akornani isumaqatigiissuteqartoqarnissaa.

Tamannali aatsaat atuutissaaq atornerluinermik katsorsaaneq isertitsivimmi ingerlanneqarpat. Taamaalilluni isertitsiviit *avataanni* peqqinnissaqarfiup nalinginnaasumik atornerluinermik katsorsaaneqarfiup neqeroorutaanik inissinneqarsimasut atuinerannut atugassarititaasussanik, ilaatigut akiliuteqartarnermut, isumaqatigiissuteqartoqassanngilaq.

Allannguutissatut siunnersuummut allannguutissatut siunnersuummi tunngaviusumik aallaavigineqarpoq pineqaatissinneqarsimasut inissiisarfimmiinnerminni aallaavittut inuttut pisinnaatitaaffitik piginnassagaat taamaattumillu innuttaasut arlaat kinaluunniit assigalugu peqqinnissaqarfiup atornerluinermik katsorsarneqarnissamik neqeroorutaanik atuinissaminut pisinnaatitaaffeqartut, inissinneqarsimasumit namminermit pinerluuteqarsimasunik isumaginnittoqarfimmilluunniit akilerneqanngikkaluartumik.

Taamaattorli isertitsivinnut inissinneqarsimasut tamarmik nalinginnaasumik periarfissaqanngillat isertitsiviup avataani illoqarfimmi atornerluinermik katsorsaaneqarfiup peqataanissamut. Tamanna ilaatigut atuuppoq isertitsivinni matoqqasuni inissinneqarsimasunut.

Taamaalilluni Pinerluuteqarsimasunik Isumaqinnittoqarfiup, inuiaqatigiinnut akuulersitseqqinnissamik siunertaqartup, nammineq toqqarsinnaavaa isertitsivinni atornerluinermik katsorsaaneqarfiup neqeroorutinik aqqissuussissanerluni. Pinerluuteqarsimasunik isumaginnittoqarfiup peqqinnissaqarfimmit ikiorneqarnissani kissaatigippagu Naalakkersuisut pinerluuteqarsimasunik isumaginnittoqarfiullu akornanni tamatumunnga atugassarititaasussat, akiliuteqartarnissamut piumasaqaataajunnartut ilanngullugit, isumaqatigiissutigineqartariaqassapput.